

446

468

Bosna i Hercegovina  
Federacija Bosne i Hercegovine  
KANTON SARAJEVO

PRIMLJENO: 03-04-2017			
Organizaciona jedinica	Klasifikaciona oznaka	Redni broj	Broj priloga
01			

MARIO VUKASOVIĆ  
PARLAMENTARNA GRUPA „ODGOVOR“  
Zastupnik u Skupštini KS

SKUPŠTINA KS  
n/r Predsjedateljica Skupštine KS

Sarajevo, 03.04.2017.

**PREDMET : AMANDMANI NA PRIJEDLOG ZAKONA O OSNOVNOM ODGOJU I OBRAZOVANJU KS**

**AMANDMAN BR 1.**

U članu 93. stav (2) mijenja se i glasi:

„ (2) Školski odbor škole kao javne ustanove broji šest članova i to: jedan predstavnik Ministarstva – predsjednik, jedan predstavnik lokalne zajednice na čijem području se nalazi škola kojeg predlaže općinsko vijeće, dva predstavnika roditelja učenika koje bira vijeće roditelja i dva predstavnika radnika škole koje bira sindikat“

**Obrazloženje**

Neophodno je depolitizirati školski odbor kao organ upravljanja u školi, kako bi upravljanje školom bilo oslobođeno utjecaja politike i sukoba interesa, predloženo rješenje sa „zlatnim glasom“ diskriminira predstavnike roditelja i radnika.

**AMANDMAN BR 2.**

U članu 93. stav (11) mijenja se i glasi:

- „ (11) Za predsjednika i člana školskog odbora ne može biti imenovano lice koje je:
- a) član organa političkih stranaka (izvršna i savjetodavna),
  - b) član zakonodavne, izvršne i sudske vlasti,
  - c) državni službenik u Ministarstvu.“

## Obrazloženje

Neophodno je depolitizirati školski odbor kao organ upravljanja u školi, kako bi upravljanje školom bilo oslobođeno utjecaja politike, sukoba interesa i kako državni službenici, oni koji su službeno zaduženi za provođenje kontrole rada škola ne bili u sukobu interesa.

### AMANDMAN BR. 3

U članu 95. stav (8) mijenja se i glasi:

**„(8) Direktor škole se imenuje na period od četiri godine s mogućnošću ponovnog izbora uz ograničenje od najviše dva uzastopna mandata u istoj školi.“**

U članu 121. iza stava (5)  **dodati novi stav koji glasi:**

**„(6) Lica zatečena na poziciji direktora škole, nakon okončanja tekućeg mandata, mogu biti imenovana na dužnost direktora u istoj školi još jedanput ako na poziciji direktora škole nisu bili duže od četiri godine.“**

### Obrazloženje

Imajući u vidu da je ovaj prijedlog Zakona predvidio da se članovi školskog odbora, kao organa upravljanja, imenuju se na mandatni period od četiri godine s mogućnošću jednog reizbora – vidi: član 93. stav (20), isti princip se mora primijeniti i na mandate direktora. Mandati u visokom obrazovanju su ograničeni na dva, kao i u javnim preduzećima. Ovo je jedini način da se osnovno obrazovanje riješi „vječnih“ direktora, koji su gotovo privatizirali škole. Zakon nije precizno i kvalitetno definisao prava, obaveze i odgovornosti direktora (procedura njihovog licenciranja, kandidiranja, izbora, imenovanja, opoziva, razrješenja, moralne, prekršajne i krivične odgovornosti, novčane nagrade i kaznene odredbe). Škola mora postojati zbog učenika, a ne zbog direktora. Dodavanjem dodatnog stava u članu 121. se osigurava da se „vječitim“ direktorima onemogućiti uživanje u još jednom mandatu, jer se isto desilo 2011. godine kada su mandati ograničeni ali u prelaznim odredbama nije definisano na način kako predlažemo dopunu. Ukoliko se ova dopuna ne bi uvažila, svakih pet godina bi mijenjanjem Zakona o OiO ustvari omogućavali produžavanje mandata.

## **AMANDMAN BR. 4**

**U članu 95. u stavu (10) dodaju se dvije nove tačke koje glase:**

**„d) lice koje je član organa političkih stranaka (izvršna i zakonodavna) i**

**e) lice koje je član zakonodavne, izvršne i sudske vlasti.“**

**U članu 95. dodaju se tri nova stava koja glase:**

„(12) Prilikom prijave na konkurs za izbor i imenovanje direktora, kandidati su dužni dostaviti ovjerenu i potpisanu Izjavu da nisu članovi tijela ili organa niti jedne političke stranke, te da za sve vrijeme obavljanja povjerenih javnih dužnosti neće politički djelovati u smislu postupanja po datim političkim uputama ili preporukama, smjernicama i komentarima političkih stranaka, javnog angažovanja u radu stranačkih tijela ili organa, učešću u organiziranju javnih političkih istupa uključujući i javna istupanja na političkim skupovima stranaka ili njihovih organa i tijela, kao i svim drugim oblicima javnog podržavanja iznesenih stavova političkih stranaka, a na osnovu kojih bi se u javnosti mogla dovesti u pitanje njihova opredijeljena politička nepristrasnost.

(13) Sve prijave, odnosno informacije o političkom djelovanju potpisnika Izjave iz stava (12) ovog člana, dostavljaju se Komisiji koju imenuje i razrješava Vlada, a koju čini pet članova: jednog člana kojeg predlaže Komisija za obrazovanje i nauku Skupštine, jednog člana kojeg predlaže reprezentativni sindikat iz osnovnog obrazovanja, jednog člana kojeg predlaže reprezentativni sindikat iz srednjeg obrazovanja, te dva člana koje predlaže ministar.

(14) Komisija iz stava (13) ovog člana razmatra sve navode iz dostavljenih prijava i svoje mišljenje o istim dostavlja kantonalnoj inspekciji i Ministarstvu na dalje postupanje.

### **Obrazloženje**

Neophodno je depolitizirati funkciju direktora škole kao organa rukovođenja u školi, kako bi rukovođenje školom bilo oslobođeno utjecaja politike i sukoba interesa. Ovo je jedan od načina da se to uradi, na način kako je to urađeno prije nekoliko godina u ZDK. Na ovaj način izbjegavamo nepotizam pri zapošljavanju, mobing od strane direktora nad radnicima i sl. Ovim prijedlogom se smanjuje politički uticaj na menadžment škole, što doprinosi učinkovitijem i kvalitetnijem odgojno-obrazovnom procesu.

## **AMANDMAN BR. 5**

**U članu 2. dodati stav na mjestu kako pripada abecednim redom pojmnika I definiranja :**

“Vijeće roditelja je tijelo u okviru kojeg se promoviraju interesi roditelja i učenika škole u odgojno-obrazovnom procesu škole.”

### **Obrazloženje**

U ovom dijelu je neopravdano izostavljeno tijelo koje u najvećoj mjeri zastupa interese učenika I roditelja u odgojno obrazovnom procesu.

## **AMANDMAN BR 6.**

U Članu 22. st. (13) mijenja se i glasi:

**(13) Prije donošenja odluke o Mreži, ministar će uz saglasnost predstavnika lokalne zajednice, sindikata i vijeća roditelja po obavljenim konsultacijama sa istim predložiti Vladi donošenje Odluke o Mreži škola.**

### **Obrazloženje:**

Prilikom uspostavljanja Mreže škola neophodno je uraditi elaborat potrebe uspostavljanja Mreže, prilikom kojeg je neophodno uključiti sve subjekte koji direktno imaju interese u školama koje će biti dio Mreže. Uz konsultacije sa lokalnom zajednicom, sindikatom i vijećem roditelja izrada elaborata će biti kvalitetnija i postojaće međusobni koncenzus donošenja odluke o uspostavljanju Mreže.

Mreža škola je predmetnim zakonskim rješenjima preširoko postavljena te je ostavljena velika diskreciona ovlast ministru I Vladi da vrše uspostavu mreže škola. Iako je iz zakona nejasno šta ona tačno predstavlja, neophodno je u takve velike zahvate koji mogu pogoditi kako nastavnike tako i učenike i njihove roditelje, uključiti lokalnu zajednicu, sindikat I Vijeće roditelja kao socijalne partnere u ostvarivanju najracionalnijeg rješenja. Tek koncenzualno uspostavljanje mreže škola bi imalo svoje opravdanje u praksi.

#### **AMANDMAN BR. 7**

U Članu 29. dodoje se novi st. (7) i glasi:

(7) Finansiranje vannastavnih aktivnosti se vrši iz budžeta Vlade.

#### **Obrazloženje:**

Osnovno obrazovanje je obavezno obrazovanje. Stoga je država dužna osigurati finansiranje svih aktivnosti koje imaju odgojno-obrazovnu svrhu. Vannastavne aktivnosti finansirane od strane roditelja, koji se ovim zakonom marginaliziraju kao sudionici odgojno-obrazovnog procesa je dodatni namet na trenutnu socijalnu situaciju u kantonu Sarajevo.

#### **AMANDMAN BR. 8**

U članu 99. st (9) dodoaje se nova tačka koja glasi:

**e) Vijeće roditelja putem predsjednika Vijeća roditelja škole**

#### **Obrazloženje:**

Neprirodno je i neosnovano da Vijeće roditelja ne može podnijeti inicijativu za razrješenje direktora u slučaju kršenja zakona, koju u daljoj procedure razmatraju nadležni organi.

Zastupnik u Skupštini KS



